

Արջաորս



Exported from Wikisource on 08/04/20

Աջաորս

←

[Եղջերուի
մահը](#)

[Հովհաննէս
Թումանյան](#)

[Խորհրդավոր
ծերունին](#) →

[[60](#)]

ԱՐՋԱՌՐՍ

Ա

Մի կերի տարի ես ու մեր Ավագը
Մասրեքում խոզ էինք պահում: Հիմի մի
աշունքվա գիշեր քերել ենք խոզը իր
նիստն արել ու դափի դռանը մի կրակ
վառել, որ բոցն աստծու ոտներն էրում է:
Մի լուսնյակ գիշեր է: Ես պկու եմ
ածում, էս Ավագն էլ մի բայաթի է վեր
քաշել, որ սար ու ձոր գվգվում են:

Մին էլ Ավագը, թե՛ ա՛յ տղա, էն ո՞վ
է, հրե մի մարդ է գալի վերի կոնիցը:

Մտիկ տամ տեսնեմ, դրուստ որ՛ մի
մարդ է գալի վերևիցը: Ամա ես էլ լսել
եմ, որ արջը գողության գալիս՝ խաբելու
համար առաջի երկու ոտը դռնին է գնում,
երկու ոտնանի մարդի նման է գալի, ոնց
որ մարդ ըլի:

Ասի՛ Ավագ, էս օքմին չի, արջ է:

Թե՛ բո՛հ, չէ-չէ՛ պոզեր:

Ա՛յ տղա, ասի՛ արջ է:

Ես՛ հա, սա՛ չէ. ես՛ հա, սա՛ չէ: Իսկ
նա էլ կամաց-կամաց կողքրիան
մոտենում է, ու ձեռներիս էլ հրացան

չկա: Մին էլ էն տեսանք՝ առաջի երկու ոտը վեր դրավ, դառավ չորսոտնանի ու, ա՛ռ հա կտաս՝ խոզի կես տեղը: Խոզը ճղճղալով իրար խառնվեց, հավաքվեց արջի վրա:

— Ալաբա՛շ, բռնի հա՛ բռնի, հրես հա՛ հրես:

Ամեն միսն մի ածխակոթ վեր կալանք, վազեցինք: Մի հաստլիկ մերուն ունեինք. ականջ դնենք, որ սրա ճղղոցը ներքի փոսերիցն է գալի: Վազ տվինք փոսերի վրա: Ածխակոթը քաշել ենք, հիմի էս անհրավին վեր ենք հատում, տալիս ենք, ինչ անում ենք, չենք անում, մերունը բաց չի թողնում. առաջներս խտրտած ձորն է ընկնում: Վերջը, շատ տեղը նեղացրինք, չէ՛, թող արավ, փախավ:

Առավոտը ասի՝ Ավագ, դու խոզի կշտին կաց, ես գնամ տանիցը մի հրացան բերեմ:

Թե՛ դե՛, լավ:

Բ

Ավագը խոզի կշտին կացավ, ես գնացի. տանը մի հին հրացան ունեինք, վեր կալա եկա: Եկա, շիտակ գնացի ներքի մոշուտնին, որտեղ գիտեմ արջի տեղն է: Ման եկա, որ գտա ոչ, մի տեղ մի լավ մոշուտ պատահեց, կանգնեցի, ասի՝ մի քիչ մոշ ուտեմ: Միամիտ մոշ ուտելիս՝ հենց մոշենու տակիցը մինը ֆրթացրեց ու հրացանս բռնեց:

Դու մի ասիլ, գնացել եմ հենց անտեր արջի վրա եմ կանգնել:

Որ հրացանիս լուրիցը բռնեց, ես էլ կորը պինդ բռնեցի: Հիմի նա օլորում է, ուզում է կոտրի, ես էլ օլորում եմ, որ հենց անեմ ծերը վրեն ընկնի, հուպ տամ, ծուխը փորն անեմ: Բայց անտերը գլխի է ընկել, թողնում չի:

Ես ձգեցի, նա ձգեց, տեսա, որ բան չի դառնում, ձեռս գցեցի, ասի հանկարծ խլեմ: Ձեռս գցեցի թե չէ, թանթիկը բերավ ուսովս պատ տվավ: Որ թանթիկն ուսովս պատ տվավ, հրացանը բաց թողեց: Էնքան արի՛ հրացանի ծերը փորին դեմ առավ, չախմախը ձեռս գցեցի, ասի՝ Էս է, բանը պրծավ: Վերի ոտը քաշեցի՝ չրթկացրի, տրաքեց ոչ: Մտիկ տամ, տեսնեմ՝ քարը վեր է ընկել, կորել: Էստեղ մեջքս կոտրեց: Հրացանը բաց թողի, ասի՝ խտրտիցն ազատվեմ, եղավ ոչ: Բռնեցինք իրար:

Գ

Դեռ քաշեցինք, դեռ քաշեցինք: Տեսնեմ՝ անտերն, Էս է, ինձ ուտում է: Ձեն տվի, «Ա՛լաբաշ, հե՛յ. . . Ա՛լաբաշ, հե՛յ. . .»:

Մին էլ տեսա շունը կլանչելով գալիս է: ~~Սե~~կավ հասավ: «Ա՛լաբաշ, օգնի, ասի, ինձ կերավ...»: Հա՛յ քեզ մատաղ, շո՛ւն, որ հասավ մեջքին տվավ էլի, ոնց որ մի գնդակ ըլի: Ամա ի՛նչ, էն շունը թե նրա մեջքին տված, թե էն լեռ քարափին:

Ոնց որ երկու փահլևան պինդ իրար բռնեն, բռնել ենք ու աչք աչքի ենք գցել: Մին էլ էն տեսա՝ կում արավ ու մարգի պես երեսիս մի մեծ թքեց՝ թո՛ւ: Որ թուքն աչքերս բռնեց, գլուխս դռչիս վրա

կոացրի, ետնուց էլ թանթիկով մի թունդ
ապտակ հասցրեց, ու ինձ կորցրի:

Տեսա՝ էլ ազատվելու գուռը չկա,
ասի՝ ես առաջուց երեսիս վրա վեր
ընկնեմ, որ երեսս փչացնի ոչ:
Բերանսիվեր տակին վեր ընկա: Որ
տակին վեր ընկա, շունն ավելի
կատաղեց: Արջն ընկել է ինձ վրա, շունը
ետևից իրեն ուտում է, որտեղից բռնում է՝
օգուտ չի անում: Դու մի ասիլ վարպետ
շուն է, գիտի արջը որտեղից կխեղճանա:
Մեջքին վեր էլավ, ականջներիցը բռնեց:
Որ ականջներիցը բռնեց, արջը ինձ
թողեց: Անտերը գազագեց, շանը թափ
տվեց մեջքից, վեր գցեց ու բռնեց, հուպ
տվավ, թե չանչեց, էլ գիտեմ ոչ՝ ինչ
արավ, որ բաց թողեց, շունը կլանչելով
ձորն ընկավ, փախավ, կորավ:

Դ

Շունն էլ գնաց . մնացինք ես ու ինքը:
Հիմի տակին երեսս բռնած միտք եմ
անում: Իմացել եմ, որ արջը ականջ է
դնում, տեսնի շունչ կա, թե չէ: Թե
իմանում է, որ շունչ է քաշում տակի
օքմինը, ջարդում է, մինչև շունչը կտրի,
թե հո չէ՝ քոքքաթաղ է անում, թողնում
գնում, որ հոտի, հետո գա հանի ուտի:
Էս միտք անելիս մին էլ էմ տեսա՝
գլուխը բերավ գլխիս վրա դրավ, շունչը
իրեն քաշեց. ականջ է դրել: Ես էլ
շունչս փորս գցեցի, ոնց որ թե մեռած եմ:
Գլուխը վեր քաշեց, մի քիչ կացավ՝ մին
էլ ականջ դրավ: Էլ ետ շունչս պահեցի:
Սա որ տեսավ՝ ես, էս է, մեռած եմ, ինձ
թող արավ մրթմրթալով գնաց: Աչքս
ծերպ արի, ասի՝ մտիկ անեմ, տեսնեմ

նոր է գնում: Ասում են՝ հենց լինի մի քիչ տեղ՝ հեռանա, վեր կենամ փախչեն: Գնաց՝ մոտիկ ցախ ու մախ կար, փետ կար, հավաքեց բերավ վրես ածավ: Մեջքիս վրա դրավ, շլինքիս վրա դրավ, էլ ետ գնաց: Գնաց, մի թեթև ցըցչորի կար, էն էլ բերավ ոտներիս վրա դրավ, մին էլ ետ գնաց:

Տեսնեն՝ մի ահագին քոթուկ կա, չարչարվում է պոկի, որ բերի էն էլ վրես գցի: Միտք արի որ՝ թե էս քոթուկը բերի վրես գցի, տակին շունչս կկտրի: Ասի, քանի ուշքը քոթուկումն է, վեր կենամ կորչեն: Փորսող տալով փետերի տակիցը դուրս եկա, փախա մտա մոտիկ մամխուտը, տապ արի:

Հիմի տապ արած տեղիցը մտիկ եմ անում: Չարչարվեց, քոթուկը պոկեց ու, ոնց որ մարդը խտրտի, խտրտեց, բերավ թե վրես գցի: Եկավ տեսավ փետերի տակին մարդ չկա: Քոթուկը խտրտին զարմացած կանգնեց, փետերի տակին մտիկ արավ, չորս կուռը մտիկ արավ, հանկարծ քոթուկը վեր գցեց ու՝ թո՛ւ հա թո՛ւ, թո՛ւ հա թո՛ւ, մարդի նման թքոտում է. ասի երևի ափսոսում է, էլի՛:

Թո՛ւ հա թո՛ւ անելով, ճոճոացնելով ընկավ ներքի ձորը: Ես էլ վեր կացա, դուրս պրծա դեպի Ավագը: Գալիս եմ, ոնց եմ գալիս, ոնց որ հետ ածած լինեն: Ետ եմ մտիկ անում, ասում են՝ տեսնեն, հո արջը գալիս չի: Հասա մեր խոզի նիստը: Էս Ավագը, թե՛ ա՛յ տղա, էդ ի՞նչ խաբար է, էդ ի՞նչ ես եղել: Ասի՛ էլ խաբարը ո՞րն է, քո տունը քանդվի, էսենց բան եկավ գլուխս: Թե՛ բա հրացանդ ո՞ւր է:

Նոր տեսնեմ, որ հրացանս մտիցս
ընկել է, թողել եմ տեղը:

Ե

Եկանք մի քանի հոգի
հավաքվեցինք, գնացինք հրացանս
բերինք: Հրացանիս քարը շինեցի,
պնդացրի, ասի՝ Ավա՛գ, էլի պետք է
գնամ: Թե՛ ա՛յ տղա, ձեռք վեր կալ,
կբռնի կզգի: Ասի՝ հիմի սովորեցի,
էնպես չեմ անի, որ բռնի:

Թե՛ դու գիտես:

Հրացանս, վեր կալա, քարը
պնդացրի ու գնացի: Տանձի էլ կաթոցի
ժամանակն է: Գնացի մինչև ճաշ ման
եմ⁶⁴, ոտնահան եղա, գտա ոչ: Միտք
արի՛ ախպեր, սա ուր կլինի քաշված,
ախր սա պետք է որ էս խոզի կողմերից
հեռանա ոչ: Վեր կացա, ասի՛ ներքեն
մոշուտների վրա:

Մի քիչ գնացի, մին էլ տեսնեմ, ըհր՛,
արջի հետքը առաջիս: Հետքն ընկա
գնացի, գնամ՝ տեսնեմ՝ հրես՝ մի բարդի
կրծել է, կրծել ու թողել: Գլխի ընկա, որ
սրանում մեղր կա: Վերև մտիկ տամ՝
ճանճը արկանոցից բանում է: Ասի՛ հիմի
թե իրեն գտնեմ էլ ոչ, էս հո որս է ու որս:
Մի քիչ էլ գնացի, տեսնեմ՝ առաջիս մի
մորմոնջաբուն է քանդել, բայց հողը դեռ
թաց է: Տեսա, որ մոտեցել եմ: Էստեղ մի
անտեր ահ ընկավ սիրտս: Հրացանի
քարին մտիկ տվի ու առաջ գնացի: Հենց
ոտս փոխեցի, մի թըմփթըմփոց եկավ:
Կանգնեցի... Բացատի գլխին մի լավ
մեղրատանձի կա. տեսնեմ՝ հրես տակին

տանձ է ուտում: Էս կռանը մի տանձ է կաթում, դենն է վագում, մրթմրթալով ծամում է ու ականջ դնում, Էն կռանը մի տանձ է կաթում, դենն է վագում: Մին էլ որ կանգնեց տանձի կաթոցին ականջ դնելու, ծառի տակը մտա, հրացանն երեսս կալա: Տեսնեմ՝ հրացանի ծերը տըմբտըմբում է: Չէ՛, սիրտս պնդացրի, մին էլ նշան դրի, հուպ տվի... Հրացանը որ տրաքեց, սա մի գոռաց, պըտիտ եկավ, ու առ հա՛ կտաս, ընկավ ներքի ձորը: Հրացանս մին էլ լցրի, մոտիկ թմբի գլուխը քարձրացա, տեսնեմ՝ սա ջրին է վագում, ասի՝ քաս սրա քանը խարաք է. վիրավորը որ ջրին գնաց, ջուր խմեց՝ պրծավ, էլ ապրիլ չի:

Մին ասի՝ ետեհցը գնամ, մին էլ ասի՝ անեծք չար սատանին, վիրավոր արջը գեշ է, կթոնի, կփչացնի: Էն է, ինչ նա դենը գնաց, ես էլ ետ եկա, էլ գիտեմ ոչ ինչ եղավ:

Միայն Էն օրերում ձորի վրա շատ ուրուր պըտիտ եկավ...

About this digital edition

This e-book comes from the online library [Wikisource](http://wikisource.org)^[1]. This multilingual digital library, built by volunteers, is committed to developing a free accessible collection of publications of every kind: novels, poems, magazines, letters...

We distribute our books for free, starting from works not copyrighted or published under a free license. You are free to use our e-books for any purpose (including commercial exploitation), under the terms of the [Creative Commons Attribution-ShareAlike 3.0 Unported](http://creativecommons.org/licenses/by-sa/3.0/)^[2] license or, at your choice, those of the [GNU FDL](http://www.gnu.org/copyleft/fdl.html)^[3].

Wikisource is constantly looking for new members. During the realization of this book, it's possible that we made some errors. You can report them at [this page](#)^[4].

The following users contributed to this book:

- Վսաղգեն
- Voskanyan
- GeoO

-
1. [↑ http://wikisource.org](http://wikisource.org)
 2. [↑ http://www.creativecommons.org/licenses/by-sa/3.0](http://www.creativecommons.org/licenses/by-sa/3.0)
 3. [↑ http://www.gnu.org/copyleft/fdl.html](http://www.gnu.org/copyleft/fdl.html)
 4. [↑ http://wikisource.org/wiki/Wikisource:Scriptorium](http://wikisource.org/wiki/Wikisource:Scriptorium)